

मार्निंग डोगरी न्यूज़ बुलेटिन, समें. 09.20 Hrs

<><><><><><>

एह आकाशवाणी जम्मू ऐ, बडलै खबरें च तुंदा सुआगत, पैहले खास-खास खबरें कन्नै श्रुति खजूरिया।

Headlines

1. उपराज्यपाल मनोज सिन्हा होरें बक्ख-बक्ख राज्यें ते केंद्र शासित प्रदेश बश्कार सांस्कृतिक आदान-प्रदान बधाने पर जोर दिता ऐ।
2. मुखमंत्री उमर अब्दुल्ला होरें आखेआ ऐ जे जम्मू-कश्मीर दा पूरा पराता विकास ते लोकें दी भलाई बेहतरी दा निश्चा उंदी सरकार गी कम्म करने दी शक्ति देने दा प्रमुख आधार थम्म न।
3. समाज कल्याण मंत्री सकीना इतू होर हर रोज सिविल सचिवालय च लोकें कन्नै मिलिए उंदे दिक्कतें बारै जाना करदियां न जेदे नै प्रशासन च पारदर्शिता ते जवाबदेही यकीनी बनदी ऐ।
4. मुख सचिव अटल डुल्लू होरें अंतरराष्ट्रीय बन्ने कश जिमिएं च फसलें दी रड़ करने गितै सांझे जत्न दा आह्वान कीता ऐ।
5. मौसम विभाग नै 18 अप्रैल थमां जम्मू-कश्मीर दे केई हिस्सें च बरखा ते बर्फबारी दी पेशगोई कीती ऐ, लोकें लेई सौहगा रौहने दी सलाह बी जारी।

हून खबरें दी तफसील कन्नै जगमोहन शर्मा।

<><><><><><>

LG-Himachal Diwas

उपराज्यपाल मनोज सिन्हा होरें जम्मू आहले राजभवन च आयोजित हिमाचल दिवस च हिस्सा लैता। उनें इस मौके पर हिमाचल प्रदेश दे लोकें गी मुबारकबाद दिती ते राज्य दी समृद्ध संस्कृति ते पन बिजली च राज्य दे बददे योगदान दी सराहना कीती। एक भारत श्रेष्ठ भारत बारै उनें आखेआ जे नमीं पहलकदमिएं कन्नै आपसी समझ ते एकता मजबूत हुंदी ऐ। सैलसफा गी बढ़ावा थहोंदा ऐ ते मकामी अर्थ बवस्था गी बल मिलदा ऐ। उनें राज्यें ते केंद्र शासित प्रदेशें बश्कार सांस्कृतिक रिश्तें गी होर बेहतर ते मजबूत करने पर जोर पाया। उनें आखेआ।



CM-Development

मुख्यमंत्री उमर अब्दुल्ला होंरें समूलचे जम्मू-कश्मीर दे सामे ते पूरे-पराते विकास, हर इलाके तोड़ी सड़क राबता ते लोकें दी भलाई-बेहतरी दे अपने सरकार दे धेड़यें गी फी पक्का करदे होई आखेआ ऐ जे एह उद्देश्य उंदे प्रशासन गी कम्म करने लेई प्रेरित करने दी शक्ति देने आहले प्रमुख आधार थम्म न। कल पुलवामा च रोमेशी नाले पर बनाए गेदे रोहम् पुलै दा उद्घाटन करदे मौके मुख्यमंत्री होंरें यकीन दोआया जे चुनाएं कोला पैहले लोकें कन्नै कीते गेदे सब्बनें वायदें गी पूरा करने च कोई असर नेई छोड़ी जाग।



Sakeena-Itoo

पारदर्शी प्रशासन ते आम लोकें दे मामलें दा फौरी हल कड्डने दे अपने जत्नें तैहत समाज कल्याण मंत्री सकीना इत्तू होर जम्मू आहले सिविल सचिवालय च पब्लिक दरबार ला रदियां न। एहदे राएं केई सारे लोक, प्रतिनिधिमंडल अपने-अपने मामले, मसले ते कल्याण सरबंधी समस्या लेड़यें उन्दे कश आवा रदे न। उनें लोड़चदी कार्रवाई लेई मौके प गै हिदायतां जारी कीतियां जंदियां न। मंत्री होंरें जमीनी सतह तगर प्रशासन दी पुज्ज लोकें दे कल्याण प्रति सरकार दी बचनबद्धता गी दोहराया। उनें आखेआ जे पब्लिक दरबार लोकें दे मसले दा फौरी हल कड्डने ते मैहकमे आसेआ कार्रवाई बश्कार पुल आहला लेखा कम्म करदे न।



Vande-Bharat Trial Run

प्रधानमंत्री नरेंद्र मोदी हुंदे आसेआ जम्मू ते श्रीनगर बश्कार वंदे भारत रेल सेवा शुरू करने कोला पैहले आहलियें अजमैशें दे हिस्सें दे तौरा पर कल 272 किलोमीटर उधमपुर श्रीनगर बारामूला रेल लाइन दे कटड़ा कोला संगलदान तोड़ी दे हिस्से पर विशेष वंदे भारत ट्रेन दा होर कामयाब ट्रायल रन कीता गोआ। इस अजमैश गी चिनाह दरेआ पर बनाए गेदे दुनिया दे सब्बनें शा उच्चे रेल पुल दे उद्घाटन आहली बक्खी इक होर कामयाब अगड़ी गेंs दे तौरा पर दिक्खेआ जा करदा ऐ। औंदं किश दिनें च एहदे उद्घाटन गी ध्यानै च रखदे होई पूरे रेल रस्ते सने आयोजन आहली थाहरै दे आले-दोआले बी सुरक्षा बंदोबस्त निगगर करी दिते गेदे न।



MoS-NEP

प्रधानमंत्री हुंदे दफ्तरै च राज्यमंत्री डॉ. जितेंद्र सिंह होरें आखेआ ऐ जे राश्ट्रीय शिक्षा नीति 2020 भारत च शिक्षा दे क्षेत्र च इक क्रांतिकारी बदलाव आहनने आहली पैहल ऐ जेदे च कताबी पढाई दे अलावा मूल्यें-कद्रें, व्यवहार कुशलता, हुनरमंदी, नजरिया विकसित करने दी छमता, समाजी बरोबरी दे सिद्धांत पर सोच, समावेशता ते समाजी सद्भाव गी शामिल कीता गेदा ऐ। भारत विकास परिषद आसेआ नर्मि दिल्ली च आयोजित इक सेमीनार च बोली होई उनें एह गल्ल आक्खी जेदा विषे हा “ समाजी सद्भाव ते शिक्षा“। डॉ. जितेंद्र सिंह होरें आखेआ जे राश्ट्रीय शिक्षा नीति 2020 भारत दिएं सांस्कृतिक जडे च नर्मि सिरेआ जान भरने, उपनिवेशवाद आहली सोच ते चलन गी खत्म करने ते समाजी सद्भाव गी मजबूत देने दा कम्म करा करदी ऐ।



ते हुन बाकि दिएं खबरें कन्नै श्रुति खजूरिया।

IB-Cultivate Land

अंतरराश्ट्रीय बन्ने कन्नै लगदे इलाके च राई-बाई लेई खाली पेदी जमीन दा इस्तेमाल करने बारे मुख सचिव अटल डुल्लू होरें सिविल सचिवालय च इक बैठक लाई। एहदे च सिविल प्रशासन ते सुरक्षा बलें दे अफसरें ते धडेँ मुतलका हिस्सा लैता। एहदा मकसद जम्मू-कश्मीर च अंतरराश्ट्रीय बन्ने कश खाली पेदी खेती आहली जमीन दा इस्तेमाल करना हा। मुख सचिव होरें राई-बाई दी पैदावार सरबन्धी मैहकमे, जिला प्रशासन ते सुरक्षाबलें पर इस गल्ला लेई जोर पाया जे ओह किट्ठे रलिए जतन करन तां जे करसानें गी उत्थे राई-बाई करने लेई प्रेरित कीता जा। बैठक च करसानें गी लोड्चदी सुरक्षा ते तकनीकी मदद उपलब्ध करोआने पर बी चर्चा होई।



Pak-Waqf

भारत नै संसद आसेआ पारित वक्फ संशोधन कन्नू पर पाकिस्तान दी बे-बुनियाद टिप्पणिएं गी सिरे थवां खारिज करी दिता ऐ। विदेश मंत्रालय दे प्रवक्ता रणधीर जायसवाल होरें वक्फ विधेयक उप्पर पाकिस्तान दी टिप्पणियें दे बारे च मीडिया दे सवालें दे परते च गलाया जे पाकिस्तान गी भारत दे अंदरूनी मामलें उप्पर टिप्पणी करने दा कोई हक नेई ऐ। उनें आखेआ जे

अल्पसंख्यकें दे अधिकारें दी रक्षा करने दी गल्ल औने उप्पर पाकिस्तान गी दुएं गी सलाह देने दी बजाय अपने खराब रिकार्ड उप्पर गौर करना लोड़चदा ऐ।

<><><><><><>

Baisakhi-Mela Udh.

उधमपुर च आयोजित त्रै रोजा बैसाखी देविका मेला सम्पन्न होई गेआ। इस मेले च लोकें बदी-चढ़िए हिस्सा लैता। जम्मू खिते थवां 60 जहार श्रद्धालुएं पवित्र देविका दे कंडे पर आयोजित इस मेले च शिकरत कीती। इसदा सरिस्ता जिला प्रशासन आसेआ कीता गेआ। मेले च खाने-पीने आहलियां चीजां, खड़ोने, सांस्कृतिक कार्यक्रम वगैरा दा सरिस्ता कीता गेदा हा। इस बारे होर जानकारी दिंदे होई साढ़े संवाददाता नै दस्सेआ।

<><><><><><>

JKAACL-Exhibition

कल विश्व कला दिवस दे मौके पर जम्मू च बी बक्ख-बक्ख संगठनें आसेआ केई चाल्ली दे आयोजन कीते गे। इस्सै सिलसिले च कला केंद्र जम्मू ते जम्मू-कश्मीर कला संस्कृति ते भाषा अकादमी आसेआ किट्ठे रलियै जी.आर संतोष आर्ट गैलरी च इक कला प्रदर्शनी दा सरिस्ता कीता गेआ जेदा उद्घाटन अकादमी दियां सचिव हरविंद्र कौर होरें कीता। इस कला प्रदर्शनी च मन्ने-परमन्ने दे कलाकारें जिंदे च पदमश्री एन.डी जम्वाल ते राजिंद्र टिक्कू शामिल न। इस बारे आकाशवाणी कन्नै गल्ल करदे होई कला केद्र जम्मू दे सचिव डॉ. जावेद राही होरें आखेआ।

<><><><><><>

Weather

मौसम विभाग ने 18 थमां 20 अप्रैल तगर जम्मू-कश्मीर दिएं उच्चिएं धारें पर हल्की थवां दरम्याने दर्जे दी बरखा ते बर्फबारी होने दी पेशगोई कीती ऐ। किश थाहरें पर भारी बरखा बी पेई सकदी ऐ। 18 अप्रैल संझा लै अंधी झक्खड़ झुलने दी बी मेद ऐ। लोकें गी सलाह दिती गेई ऐ जे ओह मौसम विभाग आसेआ जारी परामर्श ते जरूरी हिदायतें दी पालमा करन।

<><><><><><>

ISSF-Shooting

लीमा च आयोजित आई.एस.एस.एफ विश्व कप अभियान दे पैहले दिन भारत नै शानदार शुरूआत करदे होई निशानेबाजी च सुन्ने, चांदी ते कैस दे तगमे जिते। महिलाएं दे 10 मीटर एयर पिस्टल मुकाबले च सुरुचि सिंह नै ओलंपिक पदम विजेता मनु भाकर गी हराइयै सुन्ने दा तगमा जितेआ। मर्दे दे 10 मीटर एयर पिस्टल मकाबले च सौरभ चौधरी नै कैस दा तगमा जितेआ।

